


平播全書
五



平播全書

(五)

李化龍著

平定全書卷八

牌票

行總兵萬鏊移駐重慶

爲督撫地方事。本月十二日據兵巡上川東道三詳報准遊擊房嘉寵移稱。播酋楊應龍公然狂逞。親統大兵擾我綦江。又以偏師分犯南川。劫擄居民等因。又據按察司報。據重慶府綦江縣申稱。楊應龍親自統兵數萬。在於苗兒岡趕水劄營。要與房遊擊講話等因。詳到本部院。爲照楊應龍親統大兵。擾犯內地。連據急報。殊爲可恨。當今國家全盛之時。豈容小醜縱橫若此。所據總兵大將有鎮守全蜀之責。合行防禦。爲此牌仰總兵萬鏊。文到即便統領慣戰家丁。移駐重慶一帶。併川南地方。督併原有官兵。加謹防守。度其勢勢緩急。相機而行。應調軍兵。一面徑自調取。合用糧餉。一面計算的確。移文布政司通詳動支。本官到彼。務須振揚威武。設策隄防。以保萬全。毋得輕率寡謀。爲敵所誘。致損軍威。亦毋得晏然無備。任其剽掠。致傷民命。此在本官審時相機施行。毋得遲違未便。

行貴州司道防會

爲督撫地方事。本年六月十四日據防播遊擊房嘉寵報稱。播酋楊應龍近日公然親統大兵入犯綦南。

該職拏獲苗夷袁志剛郭林二名吐稱楊應龍於前月十七日點兵六萬令伊子楊朝棟分兵二萬要往貴州又分三路由松坎眞州等處入犯綦江南川勢必死戰等因到本部院爲照播酋楊應龍集兵四出復要擾犯內地明是窺我虛實故爾挑釁作歹今據報酋已兵窺黔省未審果否入犯應合行查爲此除牌行總兵官童元鎮外牌仰該司道官吏卽查播酋五六月內曾否兵犯該省有無殺擄搶掠據實查明回報如果該酋今尙屯兵彼中作何設法解散毋令軍兵聽其誘敵致損軍威亦毋晏然無備縱其擄掠致傷民命仍轉行思石等道及總兵官與參遊守備等官各將所轄信地督率原有防禦軍兵晝夜加謹隄備毋容時刻懈弛儻有緊急情形馬上差人馳報毋得遲違未便

調天全兵

爲督撫地方事據布按二司會議呈奉本部院批據總兵官萬鏊奉調防播乞要請調松潘陝兵三百三十六名雅黎遊擊吳文傑部兵三百名天全土兵一千名邛州嘉定民兵各一百名召募都蠻羿兵三千名皆當依擬調取隨營分布等因到本部院除各處前兵另行外所據天全土兵合行調發爲此除差官齎捧令旗令牌前去天全徵發外牌仰建昌道官吏卽行天全正副土官將部下土兵挑選一可當十有馬慣戰精兵一千名該道查驗堪用卽行點發就令該管掌印土官統領刻期徑赴重慶聽該道同萬總兵分布防守其行糧該道照依舊規每兵一名日支銀一分五釐馬一匹日支草料銀一分以彼處起程日期爲始到彼支月糧住止計程照日臨期扣算合於邛州庫貯銀內動支差官解交統兵官給散如由

水路應用船隻該道卽行備設各兵務要恪遵紀律經過處所不許擾害居民如違照軍令處治仍具官兵姓名文冊并起程日期報查毋遲未便

約束官兵

爲軍務事照得播酋公然親統多兵要犯內地應徵調官兵前至重茶一帶防禦誠恐經過騷擾地方合行示諭爲此示仰領兵各官務要嚴束各兵恪遵紀律行則魚貫止則林立凡經過地方必須秋毫無犯待事完之日從優犒賞敢有故違軍令生事擾害居民者許被害人稟告管押官於旗牌下按法施行如各官縱容不治許赴州縣告申本部院行拏以軍法從事決不輕饒特示

一軍兵強宿姦淫婦女者斬

一軍兵擅取民間一草一粟一雞一菜者斬

一兵行離亂部伍者斬

一住劄經行燒毀人房屋者斬

一強買物件恃衆打人生事騷擾者俱網打一百

防酋報復

爲督撫地方事本月十七日據遊擊房嘉寵報稱播酋父子劄兵於毋渡三溪劫掠鄉民職同張良賢率兵堵截回營有伏兵撞遇播賊百餘一處對敵斬獲苗級三十名願生擒五名等因到本部院除功級查

明另行給賞外。看得狡酋爲計甚詭。今我兵雖獲前級。彼必含憤抱忿。抑或陽爲失利。使我輕敵深入。中彼奸謀。黔省躁進。可爲殷鑒。又恐彼乘我之虛。長驅入犯。合就嚴行隄備。爲此牌仰兵總上川東道官吏。即便轉行該邊綦南一帶將領軍兵黨甲鄉勇。晝宵併力提防把截。不許時刻疏虞。毋因小勝驕志。爲敵所誘。致損軍威。亦無坐視侵犯。致貽民害。惟在相機動止。來則儘力撲滅。去毋深入窮追。如或故違。三尺具在。先將申飭過。遵守隄防緣由。飛報查考。毋違。

議官造軍器

爲督撫地方事。照得播酋楊應龍。邇來親統大兵。擾犯內地。勢甚猖狂。應合防禦。所有軍前急需軍器火器。先據萬總兵詳報各數前來。已批該司去後。但查應造不止所開之數。如槍刀火器。別名甚夥。應委廉幹職官。同前一併刻期製造。合行查議。爲此。除已調取守備劉天俸。前來會同製造火器。又行成都府屬併五衛揀取匠役外。牌仰布政司官吏。即會巡西道。於成都等府佐貳中議。委能幹一員。會同劉天俸。專製軍前一應軍火器具。仍備查應用。某項器械。可爲實用。某項火器。堪以禦敵。各該若干。大約用銀若干。於何項動支。專付何官置簿收支。發買何項材料。計期幾旬。可以竣事。或計幾日。一送本部院閱驗。一送該司道稽覈。務必堅利迅速。堪以禦敵。逐議通詳具報。以憑施行。此係緊急待用。毋得遲違未便。

設保甲

爲督撫地方事。照得播酋楊應龍。邇來猖狂大異往昔。既親統多兵入犯綦江。擾害居民。又差遣夷目屯

割合地。講要撤兵。明在窺我虛實。挑誘劫害。應合隄防。以保萬全。但東南兩地鄰播州縣。歧路頗多。難以寸地設兵。所有保甲自衛之法。卽平時無事。尤須注意力行。矧今師旅煩興之際。豈宜晏然。自若亟應舉行。爲此牌仰兵巡^上東道官吏。卽行鄰播一帶州縣掌印巡捕官。各將境內原有保甲。每十戶編爲一甲。置一大牌。上書總督部院明文。下列人戶姓名。家口若干。何項生理。又約幾甲編爲一黨。亦設一牌。總開姓名。各令備製弓矢槍刀器械。在城每鋪。在鄉野每村。每堡各設一黨。備大鑼一面。立有力量者充爲黨正甲長。若遇會苗出沒。或盜賊生發。急爲鳴鑼。齊聲相應。與同官兵併力撲驅。獲有苗級報官。一體給賞。毋得聽其計誘深追。致失事機。亦無怯懦逗留觀望。尤不許無故深入播境。生事啓釁。罪各有歸。捕盜官仍不時親詣鄉村查點。各具編立過黨名各總計人戶若干數目。先用花名文冊。徑報本部院查考。以甄印捕官風力。若掌印官虛應故事。不行編置。止回空文。巡捕官或因而生事害人。輒行騷擾。定行拏問。俱毋遲違未便。

預行整備精兵聽調

爲督撫地方事。照得播州土酋楊應龍。近來狂悖異常。侵犯日熾。親統大兵屯劄荃江。毋渡三溪。擾害居民。又遣頭目趙總營集兵於合江磨刀溪。講要拆堡。陰遣生苗恣行搶掠。合當進剿。查得該道所屬素有慣戰士漢雄兵。合先預備聽用。候差官令到。或另文至日卽發。爲此牌仰該道官吏。卽將後開土漢兵數。責令各土官逐一揀選。年力技藝精強。衣甲器械堅利。一可當十。堪以衝鋒破敵者。籍名在官。著實操練。

停當。檄文一至，土官親自統領管押，卽日起程。至重慶一帶，聽令分布。毋容以老弱不堪者充數糜餉。查出罪之。仍取各土官遵依不違，并有無足數甘結。該道具由黏繳查考。此係文到卽行，刻期卽至事理。嚴令各兵各備腦包絮被、鋒利器械束裝以待，行糧聽給，毋得遲違未便。

計開預整聽文應調兵

一調建武高珙等縣召募慣戰都蠻界兵三千名。

一調宜賓縣石岡兵四百名。

一調馬湖蠻夷長官司土兵一千名。

一調敘州馬湖降夷五百名。

一調黃郎馬氏土兵一千名。

一調永甯土婦下土兵五千名，又添二千名，共七千名。

右行敘馬瀘兵備道

一調永甯衛左後二所桿子手三百名。

一調鎮雄府土兵一千名。

一調烏撒軍民府土兵一千名。

一調烏蒙軍民府土兵一千名。

右行巡下南道。

一調建昌各衛應召募兵五百名。

右行建昌道。

一調茂州土兵五百名。

右行威茂道。

一調資陽縣勇兵五百名。

一調資縣勇兵五百名。

右行巡西道。

一調安縣石泉壩底鄉勇并龍安土軍五百名。又添五百名共一千名。

右行安縣道。

一調東鄉開縣弩手各三百名。

一調萬縣兵一千名。

一調雲陽縣南岸土兵五百名。

一調奉節縣南岸土兵五百名。

一調建始縣土兵五百名。

右行巡下東道。

- 一調酉陽宣撫司土兵一萬名。
- 一調平茶長官司土兵三千名。
- 一調邑梅長官司土兵一千名。
- 一調石砭宣撫司土兵五百名。
- 一調石砭司土同知土兵五百名。

右行巡上東道。共調兵三萬名零。

諭楊酋

爲督撫地方事。照得楊應龍向雖有進勦之旨。然部議猶令兩省巡按會勘。此其人尙在生死之間。若其悔罪乞哀。尙有可生之路。今不知何故。統領多兵。突犯內地。意欲何爲。豈不知四海九州。比之一播。孰大。應龍之勢。比之劉東陽。平秀吉孰強。豈天奪之魄。自取滅亡。令傍觀者欲救之不得耶。今幸兵未深入。若其速行斂退歸巢。猶可圖全。若更猖狂不已。則雖欲保全之不可得矣。合先曉諭。爲此牌仰巡上東道。即便差官速行曉諭。以後彼有差人。無得殺害。兩國交兵。不拒來使。況彼原係土司乎。聞彼以地界防兵爲詞。此只宜具文申請。何事張皇乃爾。自速天誅也。該道併諭之。差過官役。諭過情由。一面回報毋遲。

行湖省防酋

爲督撫地方事。節據防播參遊等官報稱。拏獲播苗吐稱。楊會近日集兵六萬。一犯川中。一犯楚黔等因。到本部院。看得湖省衛所。逼近播地。歧路甚多。曩者該會遣目統兵入犯。如履荒徑。且僨弁開門延寇。大損國威。今會復滋狂逞。防禦宜厚。目前該省有無動靜情形。防守將領。未見一字申報。深屬可虞。應合行查。爲此牌仰湖廣布政司官吏。即便移文彼中該道。并將領衛所等官。速查楊會時下有無入犯。地方有無失事。防禦官兵有無足恃。應否增添。與夫設險扼隘等項事宜。應調停者。陸續詳報。毋容坐視。致失事機。儻彼中有大小緩急兵形。即刻馬上差人飛報。仍行令各將領衛所等官。每半月一次。將各管地方有無甯謐。結由馬上遞報。如有違慢。定以匿情拏解軍法治罪不貸。該司先將行過緣由報查。

查鄰播府州縣防禦事宜

爲督撫地方事。照得播酋楊應龍。旣稱添兵攻城。防守最宜愼密。但綦江孤處。雖有多兵固守。尙爲可虞。鄰近城池。俱宜戒嚴。應合行查。爲此牌仰分巡上川東道官吏。即查近播府州縣。要見某城即今防守兵有若干。係某將統領。守城民夫若干。可否堪用。城外會否設有險塹。城上火器火藥弓矢槍刀。有無足用。城內糧餉。可食幾時。不足之數。會否收買。逆酋如此大逞。各城作何防守。作何偵探。作何應援。與一切固守事宜。行令各該掌印正官。會同將領一一查明。登答該道款類一詳。三日內具報。仍一面責令各印捕官。將城外壕塹。務必深淘寬闊。城上多備磚石銃彈之類。該道選委的當官員。將應備者嚴行料理。毋得遲違未便。

買餉

爲督撫地方事。照得防播官兵雲集。應備糧餉。必須充盈。除已行該司先後動銀五萬。登巡上東買米外。恐彼處地方多事之際。收買難繼。合再買運。爲此除會按院外。牌仰四川布政司官吏。卽查西北濱江一帶舟運方便。或離大江不遠府州縣某處。可買米若干。應用銀若干。或於司庫動發。或各州縣庫貯可充軍餉銀內徑支。趁今時下秋熟糴買。并再查各見貯在倉備賑穀。各有若干。作何碾米。可計若干。如何設法製過。絕其腐蛀黴氣。或用篾笕縛盛。陸續運至某處。如何堆積。應委何官前去董理。仍將各處應預備賑倉穀。作何買還以充其數。此係兵集糧隨立待事理。叮囑各守令注意。力辦完數。徑報本部院查考。該司作速先詳具報毋遲。

檄萬總兵

爲督撫地方事。本部院細詳楊酋情狀。酋所最恨者。惟參將房嘉寵。所最憚者。亦惟房嘉寵。則所致死力攻者。必在綦江無疑。若綦江有失。人心已搖。將來事勢。大有可慮。今照總兵任專大帥。奉有專敕。保守城池。乃第一義。應專力決策。嚴督兵將。固守綦江。速移該道多運稻米。以資食費。多設壕塹。以阻進攻。本官宜移駐近便地方。遙爲聲援。通令各將領一體遵照。本部院賞罰。惟以城池之存亡論。各城均屬要地。獨綦尤急。軍法具在。各宜慎思。

行上東下南敘瀘三道防守

爲軍務事。據遊擊房嘉寵報稱。楊會督兵逼近綦江縣。僅離五里。會必猖獗等因。到本部院。所有四面鄰封。州縣城池地方。俱在喫緊。應合嚴行防守。爲此牌仰該道。即便轉行合江、瀘州、江安、江津、南川、武彭、涪、豐、忠州、長壽等州縣掌印官。嚴督應捕員役。即便團練保甲。修理器械。城池損壞者。亟爲補修。糧餉缺乏者。速爲收買。遠鄉人戶。各爲設險。近城人戶。行令歸城。如遇苗人滋蔓。小則併力勦殺。大則嬰城固守。城門早閉晏開。遇夜令人巡警。掌印官不時親查。以戒不虞。毋得因循虛應故事。如有疏虞。軍法具在。

再諭楊會

爲督撫地方事。照得楊應龍雖有近旨行勦。然部議猶令兩省巡按行勘。是朝廷尙未盡絕之也。轉禍爲福。正在此時。本部院入境。意其必囚首乞哀。自求生路。不知是何項姦人誘引。令其無故興兵。隨處屯劄。甘心必犯內地。豈其陽譴已重。令必欲併一線之路塞之。而彼不自知耶。卽應調兵行勦。但恐朝廷德意。彼或未知。業經曉諭去後。未據回報。今幸兵未深入。如盡撤回巢。尙得瓦全。若復狂逞。恐將來百口無能。自文合再曉諭。爲此牌仰分巡上川東道。即便差官。速行曉諭。儻彼有不自白之冤。許令速行申辯。毋再輕弄干戈。自取天誅。該道速諭之。差官諭過情由。先行回報。毋遲未便。

防禦渝城

爲督撫地方事。照得播酋勢甚猖狂。已殘內地城池。防禦時不可疏。該府城池。雖稱天險。查閱形勢。西南通遠南紀等門。甚爲卑矮。且路達省會。亟應設險隄備。查得昔年蔡伯貫爲亂。各士夫舉監生員吏承有

力之家俱照地界責成。壕口晝夜防守。今恐人心不一。法令不行。彼此因循。致誤軍機。合發令旗。庶儆愚頑。爲此除差人齎執前來外。牌仰巡上東道官吏。卽將府城守壕之人。不拘士宦生員吏承及有力之家。各出壯丁。備鋒利器械弓弩磚石。日夜在於城上壕口。加緊隄防。掌印巡捕官。時刻查點。仍將重慶衛見任指揮千百戶。各編定一信地隄備。如遇差占。必撥頂補。至於通遠一帶緊地。多用武官軍兵嚴加守禦。通將一切城守事宜。畫圖黏貼。責成員役人戶姓名報查。如有誤事避難。及臨事不用命者。該道卽以軍法從事。其江津南川。悉照此作速移文舉行毋忽。

行巡下南敘瀘兩道移駐

爲緊急夷情事。照得播酋深入內地。攻劫搶掠。已爲極慘。合江一路。乃酋平日屢犯。目今擁衆大逞。該縣尤爲喫緊。雖有官兵防守。必資該道與_兵巡道督率庶保無虞。合行責成。爲此除會按院外。牌仰_{巡下南}敘瀘道官吏。卽便移駐相應地方。會議設策。務將此路保守無虞。該道係專敕地方。本部院已於六月十七等日。不次申嚴防守。至再至三矣。慎勿避難觀望。虛文回塞。明例昭然。誰其寬假。仍將移駐地方并日期。飛報查考。以後仍將彼中情形。一日一報。勿忽勿緩。

行各分巡道募兵防守城池

爲緊急軍情事。據巡上東道報稱。楊酋糾結苗兵。深入內地。攻劫搶掠。勢甚披猖。等因。到本部院。恐此酋率苗滋蔓。別處爲害不小。亟應募兵防守。爲此牌仰該道官吏。卽便火速行令各州縣。將城垣矮薄處所。

上緊星夜修理高固以防突攻仍動支庫銀隨其多寡各募本處精壯勇兵協同原編操兵并居住人民無論士夫均派協力萬分加謹晝夜防守城池地方其各鄉人戶俱令設險近城人戶盡收入城仍查有踪迹可疑之人俱驅逐遠去不許容留其應用錢糧聽一面先動支用不必候呈允耽時誤事其省城起至重慶一路州縣召兵防守尤爲要緊不許延遲一刻如視常怠緩者軍法具在定不輕貸各屬將募兵姓名并修守城池緣由具報以憑查考

行道募勇兵

爲督撫地方事近報播酋楊應龍統兵入犯內地聲勢甚大所有鎮城應集勁兵團練以備緩急爲此除會按院外牌仰該道官吏卽行後開州縣照數召募精兵令各備器械一面在該州縣操練聽候另文取赴本部院驗發領兵官團練施行其行糧等項就於該州縣庫貯堪動銀內照例支給此係立等事理毋得視爲泛常如違官吏提究不貸

川西道屬

崇慶州三百名	溫江縣二百名	仁壽縣二百名	井研縣一百名	邛崃縣二百名
崇甯縣一百名	灌縣二百名	新繁縣一百名	什邡縣一百名	緜竹縣一百名
漢州三百名	金堂縣一百名	雙流縣一百名	新都縣二百名	安縣二百名
德陽縣一百名	羅江縣一百名	新津縣二百名	彭縣一百名	以上共三千名

柄牌三諭楊酋

爲督撫地方事。本月二十九日據兵巡上東道呈詳。備抄楊應龍申文。內稱被房參將張遊擊。無故加兵殺擄。又隱七姓讎奴。殺絕投文人役。又將差奏目把許文志等屠殺。不得已親自會話。二官不分皂白。出兵交戰。并獲何邦卿等。聳惑揭帖。乞賜備達等因。轉報本部院批。播州係累朝爵土。楊應龍亦素有功勞。朝廷安忍一旦廢之。以貴州報伊戕殺官兵。不言勦。則無以示四夷耳。觀部覆。猶欲兩省按院行勘。此其爲伊留意。尙有餘恩。伊乃公然狂逞何也。意欲示武於人。不免增罪於己。誰爲應龍畫此計者。愚亦甚矣。今日之事。旣云激於控訴無門。若斂衆歸巢。靜聽處分。尙可自解。仰該道速宜諭之。何邦卿等以何事潛匿。曾經何衙門問斷。伊男身屍見在何所。查明另報。卽日批道轉諭去後。誠恐傳宣不到。又恐應龍愚昧。聽奸唆撥。不知部科觀會順逆兩途。以定斷案德意。合再傳諭。爲此牌仰巡上東道官吏。即便差人速諭應龍。禍福兩端。孰爲輕重。俛思朝廷三尺。不可屢干。卽令各目收回夷苗。行歸巢穴。專聽兩省按院查勘完日。會題定奪。如或痴迷。貽禍不淺。宜亟思之。毋徒晚悔。若果有難白急冤。許據實徑申兩院處分。該道仍將本部院今批情節。一一回報施行。

調取西南倉穀

爲督撫地方事。據巡上東道稟稱。播事孔亟。請將川西川南沿江一帶。有穀者。行令用船順流至重慶接濟。俟事完補還等因。到部院。看得重慶防兵應用糧餉。所需甚迫。各倉見貯穀石。應合借運。爲此稟仰四

川布政司官吏、卽行巡西巡上南二道內所屬州縣、倉儲穀每處若干、該司查照循環、酌量定數、行令文到日、差人用船裝送重慶、收貯軍中應用、各將起解數目、日時馳報、如有遲違、掌印官參治、承行吏書革役究罪施行。

催買馬

爲軍務事、照得應買戰馬、先據該司議價通詳、分行各州縣收買、及稱各馬到營之日、每馬每日給銀二分、作草料工食等因、具報部院、已經久行作速完報去後、止據雙流等縣、申報買完、其餘並無音耗、事關軍機、合行查催、爲此票仰四川布政司官吏、卽便查照原詳議定事理、將各州縣承買馬匹、剋期如數買完解驗、以便起發軍前應用、毋得再遲未便。

諭民收稻不必逃避

爲督撫地方事、近聞川東一帶民人、因播苗入犯、率多委棄已熟稻田、不肯收斂、只行逃避、恐播苗未必至、而居民生計先失、爲此牌仰巡上東道官吏、卽便出示、曉諭鄰播一帶州縣軍民人等、各將田禾收拾、仍聽該道及所司差人偵探、果有警息、暫入城中、不許張皇拋失家業、致誤生理未便。

行守巡道募兵查奸細

爲督撫地方事、先該本部院牌行各守巡兵備道、轉行各屬州縣、召募精兵、赴各該衙門防守去後、爲照聽募兵士、多係無籍之徒、如東南近播一帶、又有土民素與播酋交好、乘此募兵、攙入其中、透漏消息、應